



CONGREGATIO DE CULTU DIVINO  
ET DISCIPLINA SACRAMENTORUM

Adnexus decreto diei 11 Februarii 2018, Prot. N. 10/18

**Additiones in Libris liturgicis Ritus Romani  
de memoria B. Mariæ Virginis Ecclesiæ Matris**

IN CALENDARIUM ROMANUM GENERALEM

IUNIUS

Feria II post Pentecosten

B. Mariæ Virginis Ecclesiæ Matris

Memoria

IN MISSALE ROMANUM

Feria II post Pentecosten

**Beatæ Mariæ Virginis Ecclesiæ Matris**

Memoria

Sumitur Missa de Beata Maria Ecclesiæ Matre (p. 1172).

IN ORDINEM LECTIONUM MISSÆ

Feria II post Pentecosten

**572 bis Beatæ Mariæ Virginis Ecclesiæ Matris**

LECTIO I

**Gen 3, 9-15.20:** «*Mater cunctorum viventium*»

[Postquam comédit Adam de ligno,] vocávit eum Dóminus Deus et dixit ei...  
*Versus 15b interpretari debet secundum hebraicam veritatem, ut in Nova Vulgata.*

vel:

**Act 1,12-14:** «*Erant perseverantes in oratione cum Maria, matre Iesu*»

[Postquam assúptus est Iesus in cælum,] revérsi sunt apóstoli in Ierúsalem...

- PS. RESP. **Ps 86 (87)**, 1-2. 3 et 5. 6-7  
R/. (3): Gloriósa dicta sunt de te, civitas Dei!
- ALLEUIA O felix Virgo, quæ Dóminum genuísti;  
o beáta Mater Ecclésiæ,  
quæ in nobis foves Spíritum  
Fílii tui Iesu Christi!
- Evang. **Io 19**, 25-34: «*Ecce filius tuus. Ecce mater tua*»  
In illo témpore: Stabant iuxta crucem Iesu ... et aqua.

## IN LITURGIAM HORARUM

Feria II post Pentecosten

BEATÆ MARIÆ VIRGINIS, ECCLESIAE MATRIS

### Memoria

Beatæ Mariæ Virgini tributus est titulus Matris Ecclesiæ, cum ipsa genuisset Christum, Ecclesiæ Caput, et redemptorum facta esset Mater antequam Filius in cruce emisisset spiritum. Beatus Paulus papa VI eandem appellationem sollemniter confirmavit in allocutione ad Patres Concilii Vaticani II, die 21 novembris 1964 habita atque statuit ut «suavissimo hoc nomine iam nunc universus christianus populus magis adhuc honorem Deiparæ» tribueret.

De Communi b. Mariæ Virginis: Liturgia Horarum III, præter sequentia.

### Ad Officium lectionis

#### HYMNUS

O virgo mater, filia  
tui beáta Fílii,  
sublímis et humíllima  
præ creatúris ómnibus,

Divíni tu consílii  
fixus ab ævo términus,  
tu decus et fastígium  
natúræ nostræ máximum:

Quam sic prompsísti nóbilem,  
ut summus eius cónditor  
in ipsa per te fieret  
arte miránda cónditus.

In útero virgíneo

amor revíxit ígneus,  
cuius calóre gérmíant  
flores in terra cælici.

Patri sit et Paráclito  
tuóque Nato glória,  
cuius vocáris múnere  
mater beáta Ecclésiæ.

#### LECTIO ALTERA

Ex Allocutióne beáti Pauli Sexti, papæ, tértia Sacrosáncti Concílii Vaticáni II período  
exácta

(21 novembris 1964: AAS 56 [1964], 1015-1016)

#### *Maria Mater Ecclesiae*

Arctas ratiónes considerántes, quibus María et Ecclésia inter se coniungúntur, ad Beátæ Vírginis glóriam ad nostrúmque solácium, Mariám Sanctíssimam declarámus Matrem Ecclésiæ, hoc est totíus pópuli cristiáni, tam fidélium quam Pastórum, qui eam Matrem amantíssimam appéllant; ac statuimus ut suavíssimo hoc nómine iam nunc univérsus cristiánus pópulus magis adhuc honórem Deíparæ tríbuat eíque supplicatiónes adhibeat.

De appellatióne ágitur, Venerábiles Fratres, christianórum pietáti haud insuéta; quin immo hoc potíssimum Matris nómine christifidéles et Ecclésia univérsa Mariám invocáre præóptant. Hoc revéra nomen ad germánam Mariæ pietátis ratióne pertinet, cum in dignitáte ipsa, qua María útpote Mater Verbi Dei Incarnáti prædita est, firmiter innitátur.

Sicut enim divína Matérnitas causa est, cur María singuláres prorsus cum Christo ratiónes hábeat eadémque præsens adsit in humánæ salutis ópere a Christo Iesu perácto, ita páriter e divína Maternitáte præsertim eæ prófluunt ratiónes, quæ inter Mariám et Ecclésiám intercédunt; quandóquidem María Mater Christi est, qui statim ac in ipsíus virgináli útero humánam natúram assúmpsit, sibi ut Cápiti adiúnxit Corpus suum mýsticum, quod est Ecclésia. María ígitur, útpote Mater Christi, Mater étiam fidélium ac Pastórum ómnium, scílicet Ecclésiæ, habénda est.

Hinc causa est, cur nos, licet indígnos, licet débiles, nihilóminus fidénti ánimo filiorúmque amóre flagrántes ad Eam óculos attollámus. Quæ olim Iesum, supérnæ grátiae fontem, nobis donávit, ipsa matérnam suam opem Ecclésiæ non afférre non potest, hoc præsertim témpore, quo Christi Sponsa alacrióre stúdio salutíferum suum munus explére conténdit.

Ad hanc autem fidúciam magis usque aléndam confirmandámque, Nobis suádent arcíssima ea víncula, quæ inter hanc nostram cæléstem Matrem et humánum genus intercédunt. Etsi amplíssimis admirandisque donis a Deo cumuláta est, ut digna Mater Incarnáti Verbi efficerétur, nihilóminus María próxima nobis est. Sicut nos, et ipsa est Adæ fília, ac proptérea étiam nostra soror ob commúnem humánam natúram; quæ immúnis quidem fuit ab originária labe ob futúra Christi mérita, sed divínitus accéptis donis ipsa suæ ipsíus perféctæ fidei exéplum áddidit, ita ut evangélicum promeréret præcónium: «Beáta, quæ credidísti».

In hac mortáli vita perféctam Christi discipuli formam expréssit, spéculum fuit ómnium virtútum, atque plene in suos réttulit mores beatitúdines illas, quæ a Christo Iesu prædicátæ fuérunt. Quo fit, ut Ecclésia univérsa, dum multifórmem suam vitam

actuosámque suam navitátem éxplicat, a Deípara Vírgine absolutíssimum exéplum sumat, quo perfécte Christum imitári opórteat.

RESPONSORIUM

Cf. Lc 1, 35

R/. Spíritus Sanctus supervénit in Mariám: \* Virtus Altíssimi obumbrávit eam.

V/. Iterum eam passiónis Filii sui sóciam, ut redemptórum Matrem replévit: \* Virtus Altíssimi.

Oratio, ut ad Laudes matutinas.

Ad Laudes matutinas

HYMNUS

Quæ caritátis fúlgidum  
es astrum, Virgo, súperis,  
spei nobis mortálibus  
fons vivax es et prófluus.

Sic vales, celsa Dómina,  
in Nati cor piíssimi,  
ut qui fidénter póstulat,  
per te secúrus ímpetret.

Opem tua benígnitas  
non solum fert poscéntibus,  
sed et libénter sápius  
precántum vota prævenit.

In te misericórdia,  
in te magnificéntia;  
tu bonitátis cúmulas  
quicquid creáta póssident.

Patri sit et Paráclito  
tuóque Nato glória,  
cuius vocáris múnere  
mater beáta Ecclésiæ.

Ad Benedictus, ant. Erant discípuli perseverántes unánimiter in oratióne, cum Mariá matre Iesu.

Oratio

Deus, misericordiárum Pater, cuius Unigénitus, cruci affixus, beátam Mariám Vírginem, Genetrícem suam, Matrem quoque nostram constituit, concéde, quæsumus, ut, eius cooperánte caritáte, Ecclésiá tua, in dies fecúndior, prolis sanctitáte exsúltet et in grémium suum cunctas átrahat famílias populórum. Per Dóminum.

## Ad Vesperas

### HYMNUS

Virgo, mater Ecclésiæ,  
ætérna porta glóriæ,  
esto nobis refúgium  
apud Patrem et Fílium.

Gloriósá Dei mater,  
cuius Natus est ac pater,  
ora pro nobis ómnibus,  
qui memóriam ágimus.

Stella maris, lux refúlgens,  
stirps regális, sancta parens,  
roga Patrem et Fílium  
ut det nobis Paráclitum.

Virgo clemens, virgo pia,  
virgo dulcis, o María,  
exáudi preces ómnium  
ad te pie clamántium.

Funde preces tuo Nato,  
crucifíxo, vulneráto,  
pro nobis et flagelláto,  
spinis puncto, felle potáto.

Alma mater summi regis,  
lux et porta celsi cæli,  
inclína te misérrimis  
geméntibus cum lácrimis.

Patri sit et Paráclito  
tuóque Nato glória,  
cuius vocáris múnere  
mater beáta Ecclésiæ.

**Vel:** Ave, maris stella.

**Ad Magnificat, ant.** Dixit Dóminus matri suæ: Múlier, ecce filius tuus. Ad discípulum autem: Ecce mater tua.

**Oratio, ut ad Laudes matutinas.**

IN MARTYROLOGIUM ROMANUM

Addi debet inter Elogia pro celebrationibus mobilibus:

**10bis.** *Feria II post Dominicam Pentecosten*

Memória beátæ Mariæ Virgini, Ecclésiæ Matris, a Christo discipulis suis commendatæ ut perseverantes in oratione Spiritui Sancto coóperent in Evangélium proclamandum.